

四庫全書

史部

欽定四庫全書

欽定續通典卷五十七

禮
嘉

天子納后妃

冊后附

宋

遼

金

元

明

宋制自太祖建隆元年立瑯邪郡夫人王氏為皇后命
所司擇日備禮冊命自後凡制書云冊命者多不行冊
禮后妃皆寫冊命告身以金花龍鳳羅紵金塗襍袋有
司進入學士院草制宣於正殿近侍收守宗室皆修貢

禮羣臣拜表稱賀又詣內東門奉牋賀皇后真宗冊德妃劉氏為皇后不欲令藩臣貢賀不降制於外廷止命學士草詞付中書仁宗冊皇后曹氏其冊制如皇太子玉用珉玉五十簡匣依冊之長短寶用金方一寸五分高一寸其文曰皇后之寶盤螭紐綬并緣冊寶法物依約舊制為之匣蓋並朱漆金塗銀其禮與通禮異不立仗不設縣前一日守宮設次於朝堂設冊寶使副次於東門外命婦次於受冊寶殿前外設皇后受冊寶位於

殿庭階下北向奉禮設冊寶使位於內東門外副使內侍位於其南差退東向北上冊寶案位於使前南向又設內給事位於北面南向其日百官常服早入次禮直官通事舍人先引中書令侍中門下侍郎中書侍郎及奉冊寶官執事人絳衣介幘詣垂拱殿門就次以俟冊降禮直官通事舍人分引宰臣樞密冊寶使副百官詣文德殿立班東西相向內侍二員自內承旨降皇后冊寶出垂拱殿奉冊寶官俱播笏率執事人禮直官薰中

書侍郎押冊中書令後從門下侍郎押寶侍中後從由
東上閣門出至文德殿庭權置禮直官通事舍人引使
副就位次引侍中於使前西向稱有制典儀曰再拜贊
者承傳使副在位官皆再拜宣曰贈尚書令冀王曹彬
孫女冊為皇后命公等持節展禮使副再拜侍中還位
門下侍郎帥主節者詣使東北主節以節授門下侍郎
門下侍郎執節授冊使冊使跪受興付主節幡隨節立
於使左次引中書令侍中詣冊寶東北西向立中書侍

郎引冊案立於中書令右中書令取冊授冊寶使冊寶
使跪受興置於案中書令中書侍郎退復班門下侍郎
引寶案於侍中之右取寶授冊寶使如上儀退復位典
儀贊拜訖禮直官通事舍人引使副押冊寶持節者前
導奉冊寶官奉昇授衛如式以次出朝堂門詣內東門
附內臣入進內臣引內外命婦入就位內侍詣閣請皇
后服褱衣冊寶至使副俱東向內給事前北向跪稱冊
寶使李迪副使王隨奉制授皇后冊寶

其冊文曰天地
定位陰陽相成

人道貫之以綱大倫后德配之以熙內治聖人有以端其本也故造舟之迎言乎簡詩人有以善其化也故周南之風著乎始粵朕冲昧祗若丕構深唯負荷之重輔佐攸艱用簡納賢明協於神人之望咨爾贈尚書令冀王配饗太祖廟建曹彬孫女唯乃祖克有武力勤勞王家保勲不伐饗厥終慶教流俊昆重然慈和善祥憑積生此邦媛其漸漬醇醲發聞馨香所從來遠矣起居祖習不待嫺姆氏之訓風容矩度自為宗黨之憲長秋職位陰教未序咨求訓範統正六列宗公鼎臣誦言於朝願即嘉時事修典禮朕以春秋之義必娶大國摯疇之家乃稱福耦謀及泰監聘以穀珪惟吉之從有命既集今遣使工部尚書同平章事李迪副使戶部侍郎參知政事王隨持節冊命爾為皇后欽哉夫唯肅恭可以侍上夫唯溫裕可以接下泰而能約則驕弗至動而慎思則悔弗萌懋乃后德修乃媛職奉承宗俛伏興復位廟儀刑家國永綏無疆之祚不其題歟

內給事入詣受冊寶殿門皇后前跪奏訖內侍進詣使
前西南跪受冊寶以授內謁者監使退復位內謁者監
主當內臣持冊寶入內東門內侍從之以次入詣殿庭
內侍贊引皇后降立庭中北向位內侍跪取冊次內侍
跪取寶立皇后右少前西向內侍二員進立皇后左少
前東向內侍稱有制內侍贊皇后再拜內侍捧冊進授
皇后皇后受以授內侍次內侍奉寶亦然復贊再拜訖
藻皇后升坐內臣引內外命婦稱賀如常儀禮畢內侍

導皇后降坐內臣還閣內外命婦朝退皇后易常服謝
皇帝皇太后用常禮百官詣東上閤門表賀哲宗元祐
五年八月太皇太后詔以皇帝納后令翰林學士御史
中丞兩省與太常禮官檢詳古今六禮沿革參考通禮
典故具為成式羣臣又議勘昏御史中丞鄭雍等請不
用陰陽之說呂大防亦言不可太后納之六年八月三
省樞密院言六禮命使納采問名納吉納成請期差執
政官攝太尉充使侍從官或判宗正官攝宗正卿充副

使以舊尚書省為皇后行第納采問名同日次日納吉
納成告期納成用穀圭為贄不用雁請期依開寶禮改
為告期親迎命使奉迎納采前擇日告天地宗廟皇帝
臨軒發冊同日先遣冊禮使副次遣奉迎使令文武百
官詣行第班迎又言據開元禮納采問名合用一使納
吉納成各別遣使今未委三禮共遣一使或各遣使又
合依發冊例立仗詔各遣使文德殿發制依發冊例立
仗七年正月詔尚書左丞蘇頌撰冊文并書學士院上

六禮詞語

其納采制文略曰太皇太后曰咨某官封姓名渾元資始肇經人倫爰及夫婦以奉天地

宗廟社稷謀於公卿咸以為宜率由舊典今遣使持節太尉某宗正卿某以禮納采問名制曰兩儀合德萬物之統以聽內治必資令族重宣舊典今遣使持節某官以禮問名納吉制曰人謀龜筮同符元吉恭順典禮今使某官以禮納吉納成制曰咨某官某之女孝友恭儉實維母儀宜奉宗廟永承天祚以黜黜黜穀圭六馬以章典禮今使某官以禮納成告期制曰謀於公卿大筮元龜罔有不臧吉日惟某月某甲子可迎率遵典禮今遣某官以禮告期奉迎制曰禮之大體欽順重正其期維吉典圖是若今遣某官以禮奉迎三月禮部

太常寺上納后儀注發六禮制書太皇太后御崇慶殿

內外命婦立班行禮畢內給事中出殿門置六禮制書

案上出內東門禮直官通事舍人引由宣祐門至文德殿後門入權置案於西閣門命使納采問名文德殿宰臣親王執政官宗室百僚大小使臣易朝服樂備而不作班定內給事奉制書案置橫街北稍東西向北上禮直官通事舍人引門下中書侍郎次引使副就橫街南承制位北向東上內給事詣使者東北而稱太皇太后有制典儀曰再拜在位官皆再拜宣制曰皇帝納后命公等持節行禮典儀曰再拜使副皆再拜授制訖典儀

曰再拜在位官皆再拜禮直官通事舍人太常博士引使副從制案出載於油絡網犢車出宣德鼓鼓吹備而不作至皇后行第大門外令使二人對奉制案立主人立大門內儼者立主人之左北面進受命出曰敢請事使者曰某奉制納采儼者入告主人曰某之女若而人既蒙制訪臣某不敢辭儼者出告入引主人出大門外再拜使者先入使者曰太皇太后制再拜宣制書畢主人再拜受訖主人進表訖再拜使者出問名同上儀使

者曰將加卜筮奉制問名主人曰臣某之女若而人既
蒙制命臣某不敢辭命使納吉納成告期並同命使納
采問名儀納吉使者曰加請卜筮占曰從制使某納吉
主人曰臣某之女若而人龜筮云吉臣預有焉臣某請
奉典制告期使者曰某奉制告期主人曰臣某謹奉典
制以上納吉納成告期請見授制接表並如納采儀臨
軒命使冊后及奉迎於文德殿百官朝服皇帝常服乘
輦至殿後閣侍中奏中嚴外辦乃服通天冠絳紗袍乘

輦出自西房降輦即御座兩省官及待制權侍郎觀察使以上分東西入殿門各就位東西相向立奉寶制御坐前奉宣后冊由東上閣門至文德殿庭橫行典儀曰拜在位官皆再拜使副受冊宣制曰冊某氏為皇后命公等持節展禮典儀曰拜使副再拜受冊寶訖典儀贊百官再拜宣制曰太皇太后制命公等持節奉迎皇后典儀贊使副再拜受節又贊百官再拜侍中奏禮畢解嚴百官再拜出皇帝常服還內冊寶至皇后行第如納

采儀使者曰某奉制授皇后備物典冊皇后受冊寶內
外命婦序立如儀主人以書奉使者奉迎百官常服班
宣德門外行第儼者請使者曰某奉制以禮迎儼者入
告主人曰臣某謹奉典制儼者出告入引主人出大門
外再拜使者先入曰有制主人再拜使者宣制畢主人
再拜受制答表又再拜姆導皇后尚宅前引升堂出立
房外典儀贊使副再拜使者曰令月吉日某等承制以
禮奉迎內侍受以入使副退主人以書授使者奉於司

言受以奏聞皇后降立堂下再拜訖升堂主人升自東階西向曰戒之戒之夙夜無違命主人退母進西階上東向施衿結帨曰勉之戒之夙夜無違命皇后升輿至中門升車出大門使副及羣臣前引將至宣德門百官宗室班迎再拜訖分班皇后入門鳴鐘鼓班迎官退廼降車入次升輿入端禮門文德殿東上閣門文德殿後門入至內東門內降輿司輿前導詣福寧殿門大次以俟晡後皇后車入宣德門侍中版奏請中嚴內侍轉奏

皇帝服通天冠絳紗袍御福寧殿尚宮引皇后出次詣
殿庭之東西向立尚儀跪奏外辦請皇帝降坐禮迎尚
宮前引詣庭中之西東面揖皇后以入導升西階入室
各就榻前立尚食跪奏具皇帝揖皇后皆坐尚食進饌
食三飯尚食進酒受爵飲尚食以饌從再飲如初三飲
用盃如再飲尚儀跪奏禮畢俱興尚宮請皇帝御常服
尚寢請皇后釋禮服入幄次日以禮朝見太皇太后皇
太后參皇太妃如宮中之儀詔從之四月太皇太后手

書曰皇帝年長中官未建歷選諸臣之家以故侍衛親
軍馬軍都虞候贈太尉孟元孫女為皇后制詔六禮尚
書左僕射兼門下侍郎呂大防攝太尉充奉迎使同知
樞密院事韓忠彥攝司徒副之尚書左丞蘇頌攝太尉
充發冊使簽書樞密院事王巖叟攝司徒副之尚書左
丞蘇轍攝太尉充告期使皇叔祖同知大宗正事宗景
攝大宗正卿副之皇伯祖判大宗正事高密郡王宗晟
攝太尉充納成使翰林學士范百祿攝宗正卿副之吏

部尚書王存攝太尉充納吉使權戶部尚書劉奉世攝
宗正卿副之翰林學士梁燾攝太尉充納采問名使御
史中丞鄭雍攝宗正卿副之五月甲午行納采問名禮
丁酉行納吉納成告期禮戊戌帝御文德殿發冊及命
使奉迎皇后已亥百官表賀於東上閣門次詣內東門
賀太皇太后又上牋賀皇后上牋賀皇太妃皇后擇日
詣景靈宮行廟見禮徽宗大觀四年冊貴妃鄭氏為皇
后議禮局重定儀注臨軒冊使皇帝御文德殿服通天

冠絳紗袍百官朝服陳黃麾細仗依古用宮架冊使出
殿門依近儀不乘輅權以穆清殿為受冊殿其日皇后
服褱衣其奉冊寶授皇后皆用內侍受冊訖皇后上表
謝皇帝內外命婦立班稱賀羣臣入殿賀皇帝於內東
門上箋賀皇后其禮儀注乞依進馬條令施行其會羣
臣及皇后會外命婦儀注並依開元開寶禮受冊之日
陳宮架用女工升降行止並依樂節而別定樂名樂章
皇后上表乞免受冊排黃麾仗及乘重翟車陳宮架鹵

簿等而於延福宮受冊其朝謁景靈宮亦止依近例云
高宗紹興十三年閏四月冊貴妃吳氏為皇后前期於
文德殿內設東西房東西閣凡香案宮架冊寶幄次舉
麾位押案位權置冊寶褥位受制承制宣制位贊者位
奉冊寶位舉冊舉寶官位及文武官僚應行事官執事
官位皆儀鸞司太常典儀分設之以俟臨軒發冊其日
質明皇帝服通天冠絳紗袍出西閣協律郎舉麾奏乾
安之樂皇帝降輦即御坐樂止冊使副以下應在位官

皆再拜侍中宣制曰冊貴妃吳氏為皇后命公等持節展禮冊使副再拜參知政事以節授冊使冊使跪受以授掌節者中書令以冊授冊使侍中以寶授副使並權置於案冊使副以下應在位官皆再拜冊使押冊副使押寶持節者前導正案之樂作出文德殿門樂止至穆清殿門外幄次權置以俟皇后首飾禕衣出閣協律郎舉麾坤安之樂作皇后至殿上中間南向立定樂止冊使副就內給事前東向跪稱冊使副姓某奉制授皇后

備禮典冊內給事入詣皇后前北向奏訖冊使舉冊授
內侍內侍轉授內謁者監副使舉寶授內侍內侍授內
謁者監掌節者以節授掌節內侍持節前導冊寶并案進
行入詣殿庭冊寶初入門宜安之樂作至位樂止皇后降
自東階至庭中北向位初行承安之樂作至位樂止皇后
再拜舉冊官搢笏跪舉冊讀冊官搢笏跪宣冊內謁者監
奉冊進授皇后皇后受以授司言又奉寶進授皇后皇后
受以授司寶司言司寶置冊寶於案舉寶官并舉案官

俱搢笏舉冊寶并案興詣東階之東西向位置定皇后
初受冊寶成安之樂作受訖樂止皇后再拜禮畢

遼皇帝納后之儀擇吉日至日后族畢集詰旦后出私
舍坐於堂皇帝遣使及媒者以牲酒饗餼至門執事
者以告使及媒者入謁再拜平身立少頃拜進酒於
皇后次及后之父母宗族兄弟酒徧再拜納幣致詞
再拜訖后族皆坐遼章錦夫人四拜請就車后辭父
母伯叔父母兄弟各四拜族長者皆再拜皇后升車父

母飲后酒如初教坊遮導贊祝后命賜以物后族追拜
進酒遂行將至宮門宰相傳勅賜皇后酒徧及送者既
至達章錦夫人率皇族奉迎再拜皇后車至便殿東南七十
步止達章錦夫人請降車負銀罍捧膝履黃道行後一
人張羔裘若襲之前一婦人捧鏡却行置鞍於道后過
其上乃詣神主室三拜南北向各一拜酌酒向謁者一
拜起居訖再拜次謁舅姑御容拜奠酒選皇族諸婦宜
子孫者再拜之授以罍膝又詣諸帝御容奠酒神賜襲

衣珠玉佩飾拜受服之后姊若妹陪拜者各賜物皇族迎者后族送者徧賜酒皆相耦飲訖后坐別殿送后者退食於次媒者傳旨命送后者列於殿北俟皇帝即御坐選皇族尊者一人當輿坐主婚禮命執事者往來致辭於后族引后族之長率送后者升當御坐皆再拜又一人少進附奏送后之辭退復位再拜后族之長及送后者向當輿者三拜南北向各一拜向謁者一拜后族之長跪問聖躬萬福再拜復奏送后之詞又再拜當輿

者與媒者行酒三周命送后者再拜皆坐終宴翼日皇帝晨興詣先帝御容拜奠酒訖復御殿宴后族及羣臣皇族后族偶飲如初百戲角觝戲馬較勝以為樂又翼日皇帝御殿賜后族及驥送后者各有差受賜者再拜進酒再拜皇帝御別殿有司進皇后服飾之籍酒五行送后者辭訖皇族獻后族禮物謝族以禮物謝當興者禮畢其冊皇后儀至日北南臣僚內外命婦詣端拱殿幕次皇后至閣侍中奏中嚴引命婦班入就東西相向

位立皇帝臨軒命使發冊使副押冊至端拱殿門外幕
次侍中奏外辦所司承旨索扇扇上舉麾樂作皇后出
閣升坐扇開簾捲偃麾樂止引命婦合班面殿起居八
拜皇后降坐樂作至殿下褥位樂止引冊入置皇后褥
位前侍中傳宣皇后四拜命婦陪位皆拜引讀冊官至
皇后褥位前俛伏跪讀訖皇后四拜陪位者皆拜引皇
后升殿使臣引冊置皇后坐前冊案退西向侍立命婦
當殿稱賀四拜引班首東階上殿致詞訖東階下殿復

位四拜侍中奏宣答稱有敕旨四拜宣答訖四拜班首
上殿進酒皇后賜押冊使副等酒訖侍中奏禮畢承旨
索扇樂止皇后起入閣樂止分引命婦等東西門出

金海陵天德二年十月冊妃徒單氏為皇后前一日儀
鸞司設座勤政殿南向設羣臣次於明堂大樂令展宮
縣於殿庭設協律郎舉麾位於樂縣西北東向閣門設
百官班位於庭並如常朝之儀又設典儀位於班之東
北贊者二人在南少却俱西向設冊使副位於殿門外

之東又設冊使副受命位於百官班前後設冊寶幄次
二於殿後東廂俱南向其日諸衛勒所部畧列黃麾細
仗於庭符寶郎奉八寶置於左右吏部侍郎奉冊禮部
侍郎奉寶匣皆置於床訖出就門外班大樂令協律郎
樂正典儀贊者各入就位羣臣等依時刻集朝堂俱就
次各服朝服侍中約刻板奏請中嚴通事舍人引羣官
入就庭東西相向立以北為上又引冊使副於東偏門
西向門下侍郎引主節奉節立於殿下東廊橫街北中

中書令中書侍郎帥舉捧冊官奉冊牀立於節南侍中
門下侍郎帥舉捧寶官奉寶牀立於冊牀之南俱西面
侍中版奏外辦殿上索扇協律郎舉麾宮縣作皇帝服
通天冠絳紗袍出自東房曲直華蓋警蹕侍衛如常儀
即座南向坐簾捲樂止通事舍人引冊使副入宮懸作
使副就受命位侍中中書令門下侍郎中書侍郎舉捧
官依舊西面立羣臣合班橫行北面如常朝之儀立定
典儀曰再拜贊者承傳班首以下羣官在位者皆再拜

班首問起居又再拜閤門官引攝侍中出班承制降詣
使副東北西向稱有制使副稍前鞠躬再拜攝侍中宣
制曰命公等持節受后冊寶宣制訖又俱再拜侍中還
班門下侍郎引主節詣冊使所主節以節授門下侍郎
門下侍郎執節西向授太尉太尉授付主節主節立於
使副之左右門下侍郎退還班位中書侍郎引冊牀門
下侍郎引寶牀立於冊使東北西向以次授與太尉太
尉皆捧授冊牀置於北寶牀置於南侍中中書令禮儀

使舉捧冊寶官及舁牀者退於東西塹道之左右相向立門下侍郎中書侍郎退還班典儀曰再拜贊者承傳羣臣在位者皆再拜訖分班東西相向立捧舉舁冊寶牀者進冊牀先行讀冊官次之寶牀次行讀寶官次之舉舁官各分左右通事舍人引冊使隨之以行持節者前導太尉初行宮縣樂作出殿門樂止攝侍中出班升殿奏侍中臣言禮畢殿上索扇簾降宮縣作降座入自東房樂止通事舍人引羣官在位者次出俟太尉司徒

徒復命禮畢還內先是有司預設太尉司徒本品草車
鹵簿於門外至殿門左右排列俟使副出鼓吹振作禮
儀使舉捧官執節者并舉舁人以冊寶少駐於泰和門
太尉司徒及讀冊寶官暫歸幕次內侍閣門引入泰和
殿俟至殿下位鼓吹止有司預供張太和殿設皇后座
於庖前殿上垂簾又設東西房於座之左右稍北又設
受冊位於殿庭西階之南東向又設內命婦次於殿之
左右大樂令設宮縣於庭協律郎設舉麾位於殿上又

冊寶次於門外又設行事官次於門左右又設外命婦
次於門之內其日諸衛於殿門外略設黃麾仗有司設
二步障於殿之西階簾前設扇左右各十紅繖一在西
階欄干外又設舉冊寶案位於使副之前北向又設宣
徽使位於北廂南向司贊設內外命婦以下陪列位於
殿庭磚道之左右每等重行異位北向內命婦在後又
設司贊位於東階東南贊者二人在南少退俱西向贊
明執事官大樂令等各就位皇后常服乘龍飾肩輿至

泰和殿後閣近仗導衛如常儀宣徽使奏中嚴冊使副
入門宮縣作俟冊使庭中立樂止冊在北實在南使副
立於牀後禮儀使帥持節者立於前舉捧冊寶官立於
冊寶牀左右讀冊寶官各立於其後宣徽使奏外辦內
侍閣門官引后出後閣宮縣作簾捲皇后降自西階左
右步障繖扇從至階下望勤政殿御閣所在立樂止冊
使進立於右宣有制閣門使內侍贊再拜冊使宣曰制
遣太尉臣某司徒臣某恭授皇后冊寶閣門使內侍贊

贊再拜冊使少退中書令侍中及舉捧官率舉舁人奉冊寶以次進於前宮縣作冊寶牀自東階升並置於殿之前楹間冊牀在北寶牀在南中留讀冊寶官立位並去帕及蓋舉舁人執之退立於西朵殿舉擡官分左右相向立讀冊寶官各立於牀之東西向立既定樂止閣門使內侍贊再拜捧謝表官以表授左立內侍內侍以授后受訖以付右立內侍持表立於右閣右閣門使贊再拜訖冊使退宮縣作持表內侍以表付閣門官隨冊

使行冊使副至門鼓吹振作如來儀入西偏門鼓吹止
冊使副至御閣所在俛伏跪奏太尉臣某司徒臣某奉
制授冊寶禮畢俛伏興退持表閣門官進表近侍接入
進讀訖退初冊使退及門樂止閣門內侍引后自西階
升殿宮縣作繖扇止於簾外退於左右朵殿前步障止
於階下卷之后於座前南向立樂止中書令詣冊牀南
立北向稱中書令臣某謹讀冊讀畢降自東階立於欄
外第一墀上西向次侍中詣寶牀南立北向揖稱侍中

臣某讀寶讀畢降階立於中書令之北西向內侍閣門引升座宮縣作坐定樂止舉捧官以次招舉昇人持帕蓋覆匝牀東置殿之左右冊牀在東寶牀在西置訖舉捧官以次降階立於中書令侍中之後立定合班北向閣門贊再拜拜訖降東階退出殿門其舉昇人置冊寶牀於東西訖各由朶殿下階於侍中等班後直出殿門以俟復入舉昇入宮受冊表謝訖內侍跪奏禮畢閣門引內外命婦陪列者以次進就北向位班首初行宮縣

作至位樂止閤門曰再拜命婦皆再拜閤門引班首自西階升樂作至階樂止進當座前北向躬致稱賀訖降自西階樂作至位樂止閤門曰再拜舍人承傳命婦等皆再拜閤門使前承令降自西階詣命婦前西北東向稱有教旨命婦等皆拜閤門使宣曰祇奉聖恩授以冊寶榮幸之至勸增深所賀知舍人曰再拜命婦皆再拜訖內侍引內命婦還宮班首初行樂作出門樂止內侍引外命婦出次宣徽使奏稱禮畢降座宮縣作入東

房樂止歸閣宮縣作至閣樂止更常服內侍承教旨宣
外命婦入會並如常儀會畢閣門引外命婦降階橫班
北向舍人曰再拜訖以次出還宮如來儀中書門下侍
郎復以引進司帥舉舁人進冊寶入內付與都點檢司
退別日會羣臣會妃主宗室等賜酒設食簪花教坊作
樂如內宴之儀越日朝永壽永寧兩宮皇后既受冊越
二日內侍設座於所御殿南向其日夙興宣徽使版奏
中嚴質明諸侍衛宮人俱詣寢殿奉迎宣徽使版奏外

辦后首飾褱衣御車內侍前導降自西階以出侍衛如
常儀至太后之裏門外降車障扇侍衛如常儀入立於
西廂東向將至宣徽使版奏請中嚴既降車宣徽使版
奏外辦太后常服宣徽使引升座南向宣徽使引后進
升至西階北面再拜進跪致謝詞存撫賜酒食並如家
人之儀禮畢宣徽使贊再拜訖宣徽使引降自西階以
出出門宣徽使奏禮畢降座入宮

元冊皇后儀前期二日儀鸞司設發冊寶案於大明殿

御座前稍西設發寶案稍東掌謁設香案於皇后殿前
設冊案於殿內座榻前稍西西寶稍東設受冊案於座
榻上稍西設受寶案於稍東侍儀司設版位冊使副位
於廷中北面冊官位於右寶位於左禮儀使位於冊案
前主節位於太尉左皇后殿廷亦如之至期大昕引贊
叙太尉以下於闕廷各公服侍儀使禮儀使引冊使引
冊奉冊舉冊讀冊捧冊官由月華門入侍儀使禮儀使
引冊副引寶奉寶舉寶讀寶捧寶官由日精門入至露

欽定四庫全書

欽定四庫全書
卷五十七

三

階下依班位立侍儀捧牙牌入至寢殿前跪報外辦內侍入奏出傳制曰可侍儀使俛伏興皇帝出閣升輦鳴鞭三侍儀使引導從道皇帝入大明殿陞御座鳴鞭三司晨報時鷄唱畢尚引引殿前班入起居位起居贊拜舞蹈山呼如儀宣贊唱曰各恭事引贊引冊使以下入就位掌儀舍人引承奉班都知侍儀使禮儀使主節捧冊捧寶官升自左階由東南門入至御座前分左右相向立掌儀贊曰禮儀使稍前跪太尉以下皆跪禮儀使跪

奏請進發皇后冊寶掌儀贊曰就拜曰興曰平身曰太尉以下皆興曰復位掌儀贊曰內謁者稍前曰措笏曰捧冊寶跪進皇帝曰以冊寶授捧冊寶官捧冊寶跪受興掌儀贊曰主節官措笏持節禮儀使引節導冊寶由正門出至露階南向立禮儀使稱有制承奉班都知唱曰太尉以下皆再拜通贊曰鞠躬曰拜曰興曰拜曰興曰平身禮儀使宣制曰命太尉某等持節授皇后冊寶通贊贊曰鞠躬曰拜曰興曰拜曰興曰平身降至露階

下依次就位掌儀贊曰以冊寶置於案曰出笏曰復位
方興舁以行樂作侍儀使禮儀使引太尉及冊寶官奉
隨至皇后宮庭奠案樂止掌儀贊曰捧冊寶官稍前搢
笏捧冊寶置於案曰出笏曰復位侍儀使稍前跪報外
辦內侍入啟出傳旨曰可侍儀使俛伏興皇后出閣詣
褥位太尉稱制遣臣某等恭授皇后冊寶內侍贊禮曰
跪掌儀贊曰太尉以下皆跪內侍贊皇后曰上香曰上
香曰三上香曰拜曰興曰拜曰興掌儀贊曰太尉以下

皆興皇后陞殿立於座榻前承奉班都知唱曰太尉以下進冊寶掌儀贊曰捧冊寶官稍前搢笏捧冊寶由正門至殿內掌儀贊曰以冊寶跪置於案曰捧冊寶官出笏興復位曰太尉以下皆跪曰舉冊官興至案前跪曰搢笏取冊於匣置於盤對舉曰讀冊官興至案前跪曰讀冊讀冊官稱臣某謹讀冊畢納冊於匣掌儀贊曰出笏舉寶官興至案前跪搢笏取寶於盂對舉曰讀寶官興至案前跪曰讀寶讀寶官稱臣謹讀寶讀畢納寶

於盥掌儀贊曰出笏曰太尉以下皆就拜曰興曰平身
捧寶冊官以冊寶授太尉太尉以授掌謁掌謁以冊寶
置於受冊寶案掌儀贊曰太尉以下跪曰衆官皆跪太
尉致祝辭曰冊寶禮畢伏願皇后與天同算司徒應曰
如所祝就拜興平身太尉進酒樂作皇后飲畢樂止禮
儀使引節引主節由正門以出侍儀使引太尉以下由
左門至階下北面立承奉班都知唱曰太尉以下皆再
拜通贊曰鞠躬曰拜曰興曰拜興曰平立侍儀使引太

尉以下還詣皇帝御座前跪奏曰奉制授皇后冊寶謹以禮畢就拜興由左門出降詣旁折位侍儀使引導從導皇后詣大明殿前謝恩掌謁贊曰拜曰興曰興侍儀使分退掌謁導皇后升御座典引引丞相以下入起居位起居贊拜如儀侍儀使詣右丞相前請進酒雙引升殿至宇下褥位立侍儀使分左右北向立俟前行色曲將半舞旋列定通贊唱曰分班樂作侍儀使引右丞相由南東門入宣徽使奉隨至御榻前右丞相跪宣徽使

立於東南曲終右丞相祝贊曰冊寶禮畢臣等不勝慶
忭同上皇帝皇后萬萬歲壽宣徽使應曰如所祝右丞
相俛伏興退詣進酒位進酒進表章禮物贊拜僧道賀
獻大宴殿上並如元正儀宴畢鳴鞭三侍儀使導賀引
進使導后還寢殿如來儀

明初諸帝皆即位後行冊立禮正統七年英宗大婚始
定儀注凡納采問名前期擇日遣官告天地宗廟至期
設御座制案節案鹵簿綵輿中和大樂如儀禮部陳禮

物於丹陛上及文樓下質明皇帝冕服陞座百官朝服
行禮訖各就位正副使朝服四拜執事舉制案節案由
中門出禮物隨之俱置丹陛中道傳制官宣制曰茲選
某官某女為皇后命卿等持節行納采問名禮正副使
四拜駕興舉制節案由奉天門中門出正副使取節及
制書置綵輿中儀仗大樂前導出大明門釋朝服乘馬
行詣皇后第第中設使者幕次於大門外左南向設香
案於正堂設制節案於南別設案於北使者至引禮導

入幕次執事官陳禮物於正堂使者出次奉制書於案
禮官先入立於東立婚朝服立於西禮官曰奉制建后
遣使行納采問名禮引主婚者出迎使者捧制書及節
主婚者隨至堂置制書及節於案正副使分立案左右
主婚者四拜詣案前跪正使取納采制書宣曰朕承天
序欽紹鴻圖經國之道正家為本夫婦之倫乾坤之義
實以相宗祀之敬協奉養之誠所資唯重祇遵聖母皇
太后命遣使持節以禮采擇宣訖授主婚者主婚者授

執事者置於北案上稍左副使取問名制宣曰朕唯夫婦之道大倫之本正位乎內必資名家特遣使持節以禮問名尚佇來聞宣訖授如前置案上稍右主婚者俯伏興執事舉表案以表授主婚者主婚者跪授正使表曰臣某伏承嘉命正使某官某等重宣制詔問臣名族臣女臣夫婦所生先臣某官某之曾孫先臣某官某之孫先臣某官某之外孫臣女今年若干謹具奏聞主婚者俯伏退四拜使者出置表綵輿中主婚者前曰請禮

從者酒饌畢主婚者捧幣以勞使者使者出主婚者送
至大門外使者隨綵輿入大明門左門至奉天門外以
表節授司禮監復命次納吉納徵告期傳制遣使並如
前儀但納徵用元纁束帛六馬鼓璧等物制詞曰茲聘
某官某女為皇后命卿等持節行納吉納徵告期禮皇
后第陳設如前唯更設玉帛案使者至以制書玉帛置
案上六馬陳堂下執事先設皇后冠服諸物於正堂禮
官入主婚者出迎執事舉玉帛案正使捧納吉納徵制

書副使捧告期制書執事者捧節以次入各置於案主
婚者四拜詣案前跪正使取制書宣曰大婚之卜龜筮
師士協從敬循禮典遣使持節告吉又宣曰卿女有貞靜
之德稱母儀之選宜共承天地宗廟遣使持節以禮納
徵宣訖授主婚者正副使又捧圭及元纁以授主婚者
俱如前儀副使取制書宣曰歲令月良吉日某甲子大
婚維宜特遣使持節以禮告期宣訖授如前儀主婚者
四拜使者持節出主婚者禮使者使者還復命如初次

發冊奉迎所司陳設如前儀禮部陳雁及禮物於丹陛上內官監陳皇后鹵簿車輅於奉天門外制詞曰茲冊某官某女為皇后命卿等持節奉冊寶行奉迎禮正副使以冊寶置綵輿中隨詣皇后第至門取制書冊寶置案上禮官先入主婚者朝服出見禮官曰奉制冊后遣使持節奉冊寶行奉迎禮主婚者出迎執事者舉案前行使者捧制書及節執事者以雁及禮物從之至堂中各置於案使者左右立主婚者四拜退主於西南女官

以九龍四鳳冠褙衣進皇后內官陳儀仗於中堂前設
女樂於堂下作止如常儀使者以節冊寶授司禮監官
內贊導入中堂皇后具服出閣詣香案前向闕立四拜
贊宣冊皇后跪宣冊官宣訖以授皇后皇后指圭受冊
以授女官女官跪受立於西贊宣寶如宣冊儀贊出圭
贊興四拜訖皇后入閣司禮監官持節出授使者報受
冊寶禮畢主婚者詣案前跪正使取奉迎制宣訖授主
婚者副使進雁及禮物主婚者皆跪受如前儀主婚者

興使者四拜出主婚者禮使者如初女官奏請皇后出
閣自東階下立香案前四拜陞堂南向立主婚者進立
於東西向曰戒之敬之夙夜無違退立於東階母進立
於西東向施衿結帨曰勉之敬之夙夜無違退立於東
階內執事請乘輿皇后降階升輿導從出儀仗大樂前
行次綵輿正副使隨次司禮監官擁導從大明門中門
入百官朝服於承天門外班迎候輿入乃退皇后至午
門外鳴鐘鼓鹵簿止正副使以節授司禮監復命授冊

寶官捧冊寶儀仗女樂前導進奉天門至內庭幕次司
禮監以冊寶授女官皇后出輿由西階進皇帝由東階降
迎於庭揖皇后入內殿帝詣更服處具袞冕后詣更服
處更禮服同詣奉先殿行謁廟禮祭畢還宮合卺帝更
皮弁升內殿后更衣從陞各陞座東西相向執事者舉
饌案於前女官取四金爵酌酒以進既飲進饌復進酒
進飯訖女官以兩卮酌酒合和以進既飲又進饌畢興
易常服帝從者餽后之饌后從者餽帝之饌次日早帝

后皆禮服候太后陞座帝后進座前宮人以殿修盤立於后左帝后皆四拜執事舉案至宮人以殿修盤授后后捧於案女官舉案后隨至太后前進訖復位帝后皆四拜三日早帝冕服后禮服同詣太后宮行八拜禮還宮帝服皮弁升座女官導后禮服詣帝前行八拜禮后還宮升座引禮導在內親屬及六尚等女官行八拜禮次各監局內官內使行八拜禮是日皇帝御奉天殿頒詔如常儀四日早皇帝服袞冕御華蓋殿親王八拜次

執事者五拜遂陞奉天殿百官進表行慶賀禮是日太
后及皇后各禮服陞座親王入八拜出次內外命婦慶
賀及外命婦進表箋皆如常儀五日行盥饋禮尚膳監
具膳修皇后禮服詣太后前四拜尚食以膳授皇后皇
后捧膳進於案復位四拜退立於西南俟膳畢引出其
冊皇后儀自太祖初定制凡冊皇后前期三日齋戒遣
官祭告天地宗廟前一日侍儀司設冊寶案於奉天殿
御座前設奉節官位於冊案之東掌節者位於其左稍

退設承制官位於其南俱西向設立副使受制位於橫街之南北向設承制宣制官位於其北設奉節奉冊奉寶官位於其東北俱西向設正副使受冊寶褥位於受制位之北北向典儀二人位丹陛上南贊禮二人位正副使北知班二人位贊禮之南東西相向百官及侍從位如朝儀是日早列鹵簿陳甲士設樂如儀內官設皇后受冊位及冊節寶案於宮中設香案於殿上設權置冊寶案於香案前設女樂於丹陛質明正副使及百官

入鼓三嚴皇帝袞冕御奉天殿禮部官奉冊寶各置於案諸執事官各入就殿上位立樂作四拜興樂止承制官奏發皇后冊寶承制訖由中門出降自中陞至宣制位曰有制正副使跪承制官宣制曰冊妃某氏為皇后命卿等持節展禮宣畢由殿西門入正副使俯伏興執事舉寶冊案由中門出降自中陞奉節官率掌節者前導至正副使褥位以案置於北掌節者脫節衣以節授奉節官奉節官以授正使正使以授掌節者掌節者跪

受興立於正使之左奉節官退引禮引正使詣受冊位
奉冊官以冊授正使正使跪受置於案退復位副使受
寶亦如之樂作正副使四拜興樂止正使隨冊副使隨
寶掌節者前導舉業者次之樂作出奉天門樂止侍儀
奏禮畢駕興百官出掌節者加節衣奉冊寶官皆搢笏
取冊寶置龍亭內儀仗大樂前導至中宮門外樂作皇
后具九龍四鳳冠服褱衣出閣至殿上南向立樂止正
副使奉冊寶擯置於門外所設案上引禮引正副使及

內使監令俱就位正使詣內使監令前稱冊禮使臣某
副使臣某奉制受皇后冊寶內使監令入告皇后出復
位引禮引內外命婦入就位正使奉冊授內使監令內
使監令跪受以授內官副使授寶亦如之各復位內使
監令率奉冊奉寶內官入各置於案尚儀引皇后降陞
詣庭中位立內官奉冊寶立於皇后之東西內使監令
稱有制尚儀奏拜皇后拜樂作四拜興樂止宣制訖奉
冊內官以冊授讀冊內官讀訖以授內使監令內使監

令跪以授皇后皇后跪受以授司言奉寶如前儀受訖以授司寶尚儀奏拜皇后拜如前內使監令出詣正副使前稱皇后受冊禮畢使者退詣奉天殿橫街南北面西上立給事中立於正副使東北西向正副使再拜復命曰奉制冊命皇后禮畢又再拜給事中奏聞乃退皇后既受冊寶升座引禮引內命婦班首一人詣殿中賀位跪致詞曰茲遇皇后殿下膺受冊寶正位中宮妾等不勝懽慶謹奉賀贊拜樂作再拜興樂止退復位又引

外命婦班首一人入就殿上賀位如內命婦儀禮畢俱
出皇后降座樂作還閣樂止次日百官上表箋稱賀皇
帝御殿受賀如常儀遂卜日行謁廟禮先遣官用牲牢
行事告以皇后將祇見之意前期皇后齋三日內外命
婦及執事內官齋一日設皇后拜位於廟門外及廟中
設內命婦陪祀位於廟庭南外命婦陪祀位於內命婦
之南司贊位皇后拜位之東西司賓位內命婦之北司
香位香案右陳盥洗於階東司盥洗官位其所至日內

外命婦各翟衣集中宮內門外皇后具九龍四鳳冠服
褱衣出內宮門升輿至外門外降輿升重翟車鼓吹設
而不作尚儀陳儀衛次外命婦次內命婦皆乘車前導
內使監扈從宿衛陳兵仗前後導從皇后至廟門司賓
引命婦先入皇后降車司贊導自左門外入就位北向
立命婦各就位北向立司贊奏拜司賓贊拜皇后及命
婦皆再拜興司贊請詣盥洗位盥手帨手由東陞升至
神位前司贊奏上香者三司香捧香於右皇后三上訖

導復位贊拜如前司贊奏禮畢皇后出自廟之左門命婦以次出皇后升車命婦前導如來儀過廟鼓吹振作皇后入宮是日皇帝宴羣臣於謹身殿皇后宴內外命婦於中宮皆如正旦宴會儀及成祖即位冊皇后徐氏其制小異皇帝皮弁服御華蓋殿翰林官以詔書用寶訖然後御奉天殿傳制皇后受冊禮畢翰林官以詔書授禮部官禮部官奉詔書於承天門開讀皇帝還宮率皇后具服謁奉先殿謁告畢皇后具服於內殿俟皇帝

升座贊引女官導詣拜位行謝恩禮樂作八拜興樂止
禮畢次日皇帝皇后受賀宴會如前儀天順八年增定
親王於皇帝前慶賀次詣皇太后慶賀次詣皇后前八
拜儀世宗嘉靖十三年冊皇后方氏禮臣具儀注有謁
告內殿儀無謁告太廟世廟之禮帝命議增於是禮臣
以儀上先期齋三日所司陳設如時衿儀至日皇帝降
輅皇后妃御翟車同詣太廟命官奉七廟主升神座訖
皇帝奉高皇帝主皇后奉高皇后主出升神座迎神上

香奠帛裸獻樂作止皆如儀次詣世廟行禮同上儀穆
宗隆慶元年增頒詔次日命婦行見皇后禮

天子冊妃嬪夫人

宋

金

明

宋內命婦有貴妃淑妃德妃賢妃大儀貴儀淑儀淑容
順儀順容婉儀婉容昭儀昭容昭媛修儀修容修媛充

儀充容充媛婕妤美人才人貴人

其官詒貴儀淑儀淑容順儀順容婉儀婉

容用遍地銷金龍五色羅紙張韜帶兩面銷金雲鳳標
紅絲網子金樣銀花塗粉錯滴粉縷金花鳳子中犀軸
婕妤才人貴人美人用遍地銷金鳳子五色羅紙張韜
帶銷金盪鳳標紅絲網子金塗銀粉縷滴粉金雲鳳標

軸瑁

金內命婦元妃貴妃淑妃德妃賢妃為正一品昭儀昭容昭媛修儀修容修媛充儀充容充媛曰九嬪正二品婕妤正三品美人正四品才人正五品各九人曰二十七日婦寶林正六品御女正七品采女正八品各二十七人曰八十一御妻

明太祖洪武三年定前期一日禮部官奉冊印入置於謹身殿御座之前其日質明文武百官朝服序立於奉

天殿丹墀之兩旁使副入就奉天殿橫街南北面立承制官奉節官奉冊印官皆入詣謹身殿俟內臣傳旨訖出自橫街南宣制妃服花釵翟衣出閣自本位宮中冊印至內使監令率內執事奉以入妃降詣庭中拜受畢妃升階就位內命婦諸親以次賀內使監令引妃謝皇帝皇后咸祖永樂七年續定上御華蓋殿具皮弁服傳制執事官舉節冊案由御道東出黃蓋遮送至奉天門用鼓樂迎至右順門內官捧入節冊將至皇妃具禮服

宮人各執扇衛從出迎於宮門外是日上率詣奉天殿
行謁告禮畢皇妃詣上前行八拜禮回宮妃升座長公
主公主親王妃及六尚等女官四品以上命婦俱行四
拜禮皇妃坐受憲宗成化二十二年冊貴妃有寶先贊
授冊後贊授寶德妃無寶止贊授冊謁告奉先殿畢先
詣皇太后前行禮世宗嘉靖十一年帝冊九嬪禮官上
儀注先日所司陳設儀仗如朔望儀至期皇帝具袞冕
告太廟世廟訖易皮弁服御華蓋殿百官公服入行禮

正副使朝服承制舉節冊至九嬪宮九嬪迎於宮門外
隨至拜位女官宣冊九嬪受冊先後八拜送節出宮門
復命九嬪隨具服候皇后率詣奉先殿謁告還詣皇帝
皇后前恩俱如冊妃禮唯圭用次玉穀文銀冊少減於
皇貴妃五分之一二十年冊德妃張氏以妃將就室而
帝方靜攝不傳制不謁告內殿餘並如舊

欽定續通典卷五十七

欽定四庫全書

史部

欽定續通典卷

五十八至
六十

詳校官監察御史臣曹錫寶

洗馬臣王坦修覆勘

校對官編修臣孫希旦

謄錄監生臣曹鎬

欽定四庫全書

欽定續通典卷五十八

禮

嘉

皇太子納妃

皇子諸

王附

宋

遼

明

宋徽宗政和五年三月詔選皇太子妃六年六月詔選少傅恩平郡王朱伯材女為皇太子妃令所司備禮冊命帝服通天冠絳紗袍御文德殿發冊先是議禮局上五禮新儀皇太子納妃乘金輅親迎皇太子三奏辭乘

輅及臨軒冊命詔免乘輅而發冊如禮焉其諸王聘禮

賜女家白金萬兩敵門

即古之納采

用羊二十口酒二十壺

綵四十匹定禮羊酒綵各加十茗百斤頭巾緞綾絹

三十匹黃金釵釧四雙條脫一副直珠琥珀瓔珞真珠

翠毛玉釵朶各二副銷金生色衣各一襲金塗銀合二

錦繡綾羅三百匹果盤花粉花冪眠羊卧鹿花餅銀勝

小色金銀錢等物納財用金器百兩綵千匹錢五十萬

錦綺綾羅絹各三百匹銷金繡畫衣十襲真珠翠毛玉

釵朶各三副函書一架纏束帛押馬函馬二十匹羊五十口酒五十壺繫羊酒紅絹百匹花粉花罽果盤銀勝等物親迎用塗金銀裝肩輿一行障坐障各一方團掌扇四引障花十樹生色燭籠十高髻釵插并童子八人騎分左右導扇輿其宗室子聘禮賜女家白金五千兩其敵門定禮納財親迎禮皆減半遠屬族卑者又減之政和三年四月議禮局上皇子納夫人儀采擇使者曰奉制某王之儷屬子懿淑謹之重之使某行采擇之禮

儻者入告主人曰臣某之子顓愚不足以備采擇恭承制命臣某不敢辭問名使者曰某王之儻采擇既諧將加官占奉制問名儻者入告主人曰制以臣某之子可以奉侍某王臣某不敢辭告吉使者曰官占既吉奉制以告儻者入告主人曰臣某之子愚弗克堪占貺之吉臣與有韋臣某謹奉典制告成使者曰官占之吉嘉耦既定制使某以儀物告成儻者入告主人曰奉制賜臣以重禮臣某謹奉典制告期使者曰涓辰之良某月某

日吉制使某告期儻者入告主人曰臣某謹奉典制前期太史局擇日奏告景靈宮賜告前一日主人設使者次如常儀又設告箱之次於中門外北向隨闕所向設香案於寢庭其日大昕使者公服至主人出迎於大門外北向再拜使者不答拜謁者引使者入門而左主人入門而右舉告箱者同入主人立香案左使者在右舉告箱者以告置於香案女相者引夫人出面闕立使者稱有制女相者贊再拜使者曰賜某國夫人告又贊再

拜退使者出皇帝黜戒於所御之殿皇子乘象輅親迎夫人朝見盥饋皇帝皇后饗夫人如儀其諸王以納采賓曰某官以伉儷之重施於某王某王率循彝典以某將事敢請納采儻者入告主人曰某之子弗嫻於姆訓維是暇脩棗棗之饋未知所以告虔也某聽命於廟敢不拜嘉問名賓曰合二姓之好必稽諸龜筮敢請問名儻者入告主人曰某王恭謹重正昏禮將以加諸卜某敢不以告納吉賓曰某王承嘉命稽諸卜筮龜筮協從

使某以告儻者入告主人曰某王不忘寒素欲施德於某未教之女而卜以告吉其曷敢辭納成賓曰某官以伉儷之重施於某王某王率循彝典有不腆之幣以某將事敢請納成儻者入告主人曰某王順彝典申之以備物某敢不重拜嘉請期賓曰某王謹重嘉禮將卜諸近日使某請期儻者入告主人再辭儻者出告賓曰某既不獲受命於某官某王得吉卜曰某日敢不以告主人曰謹奉命以從親迎前一日主人設賓次如常儀其

日大昕婿之父服其服告於祖廟子將行父醮之於聽
事贊者設父位中間南向設子位父位之西近南東向
父即坐子公服升自西階進立位前贊者注酒於醕西
向授子子再拜跪受贊者又設饌父位前子舉酒興即
坐飲食訖降再拜進於父位前命之曰躬迎嘉耦釐爾
內治子再拜曰敢不奉命又再拜降出詣女家主人服
其服告於祖廟如請期之儀賓將至主人設神位於寢
戶外之西設醴女位於戶內南向具酒饋賓至贊者引

就次女盛服於房中就位南向立姆位於右從者陪其
後父公服升自東階立於寢戶外之東西向內贊者設
酒饌女就位坐飲食訖降再拜內贊者徹酒饌主人降
之東階東南西面贊者引賓出次立於門西東面儻者
進受命出請事賓曰某受命於父以茲嘉禮躬聽成命
儻者入告主人曰某固願從命儻者出告訖入引主人
迎賓大門外之東西面揖賓賓報揖主人入門而右賓
入門而左執雁者從入陳雁於庭主人升立於東階上

西面賓升西階進當寢戶前北面再拜降出主人不降
送賓初入門母出立於寢門外之西南面賓拜訖母引
女出於母左父命之曰往之女家以順為正無忘肅恭
母戒之曰必恭必戒無違舅姑之命庶母申之曰爾誠
聽於訓言母作父母羞女出門婿先還第其同牢廟見
見舅姑諸禮皆如儀凡宗室婚姻英宗治平中宗正司
奏宗室女舅姑夫族未立儀制皆當勅法詔婿家有二
世食祿即許娶宗室女未仕者與判司簿尉已仕者隨

資序推恩即婿別祖女別房舊為婚姻而於今卑尊不順者皆許婿之三代鄉貫生月人材書劄止令婚主問驗以告宗正寺大宗正司寺司詳視如條保明所進財皆賜婿家令止於本官納財媒妁使令之人非理求勾許告宗室女事舅姑及見夫之族親皆如臣庶之家其後又令宗室女再嫁者祖父有二代任殿直若州縣官以上即許婚姻神宗熙寧十年又詔應袒免以上親不得與雜類之家婚嫁若父母居化外及見居沿邊兩屬

之人其子孫亦不許為婚總麻以上親不得與諸司胥吏出職納粟得官及進納伎術工商雜類惡逆之家子孫通婚應婚嫁者委主婚宗室擇三代有任州縣官或殿直以上者列姓名家世州里歲數奏上宗正司驗實召保付內侍省宣繫聽期而行嫁女則令其婿召保其冒妄成婚者以違制論主婚宗室與保同坐不以赦降自首者減罪告者有賞非袒免者依庶姓法宗室離婚委宗正司審察若如律有可出之實或不相安方聽若

無故捃拾者劾奏如許聽離追完賜予物給還嫁資再娶者不給賜非袒免以上親與夫聽離再娶者委宗正司審核其恩澤已追奪而乞與後夫者降一等尋詔宗室女母得與嘗娶人結婚再適者不用此法

遼道宗太平八年六月權北院大王耶律鄭留奏今歲十一月皇太子納妃諸族備會親之帳詔以豪盛者三十戶給其費

明皇太子納妃儀太祖洪武元年定制凡行禮皆遣使

持節如皇帝大婚儀納采問名制曰奉制納某氏女為
皇太子妃命卿等行納采問名禮至妃第儗者出詣使
者前曰敢請事使者曰儲宮納配屬於令懷邦有常典
使某行納采之禮儗者入告主婚者曰臣某之子昧於
壺儀不足以備采擇恭承制命臣某不敢辭儗者出告
使者入陳禮物於庭宣制曰某奉詔采擇奠雁禮畢使
者出儗者復詣使者前曰敢請事使者曰儲宮之配采
擇既詣將加卜筮奉制問名儗者入告主婚者曰制以

臣某之女可以奉侍儲宮臣某不敢辭儻者出告使者復入陳禮奠雁如儀宣制曰臣某奉詔問名將謀諸卜筮主婚者曰臣某第幾女某氏出次納吉儻者請事如前使者曰謀諸卜筮其占協從制使某告吉儻者入告主婚者曰臣某之子蠢愚懼弗克堪卜筮之吉惟臣之幸臣謹奉典制儻者出告使者入陳禮奠雁如儀宣制曰奉制告吉又次納徵儻者出告使者入陳玉帛禮物不奠雁宣制曰某奉制告成又次請期辭曰詢於龜筮

某月某日吉制使某告期主婚者曰敢不承命陳禮奠
雁如儀又次告廟遣使持節授冊寶儀注悉見前又次
醺戒皇帝服通天冠絳紗袍御奉天殿百官侍立引進
導皇太子至丹陛四拜入殿東門就席位東向立司爵
以饌進皇太子跪搢圭受盞祭酒司饌以饌進跪受亦
如之興就席坐飲食訖導詣御座前跪皇帝命之曰往
迎爾相承我宗事勗思以敬皇太子曰臣某謹奉制旨
俯伏興出至丹陛四拜畢皇帝還宮皇太子出又次親

迎前一日有司設皇太子次於妃氏大門外南向東宮
官次於南東西相向至日質明東宮官具朝服陳鹵簿
鼓吹於東宮門外皇太子冕服乘輿出侍衛導從如儀
至宮門降輿升輅東宮官皆從至妃第回轅南向降輅
升輿至次降輿入就次東宮官皆就次先是皇太子將
至主婚者設會宴女至期妃服褕翟花釵出就閣南面
立傅姆立於左右主婚者具朝服立於西階之下引進
導皇太子出次立於大門之東西向儻者朝服出立於

門東曰敢請事引進跪啓訖皇太子曰某奉制親迎引進受命興承傳於儻者儻者入告導主婚者出迎於大門之西東向再拜皇太子答拜引進導皇太子入門而左執雁者從儻者導主婚者入門而右皇太子升東階進立於閤門戶前北向立主婚者升西階立於西東向引進者啟奠雁執雁者以雁進皇太子受雁以授主婚者主婚者跪受興以授左右退立於西皇太子再拜降自東階出至次以俟主婚者不降送初皇太子入門妃

母出立於閣門外奠雁位之西南向皇太子拜訖宮人
傅姆導妃出立於母左主婚者命之曰戒之戒之夙夜
恪勤母或違命母命之曰勉之勉之爾父有訓往承惟
欽庶母申之曰恭聽父母之言宮人傅姆擎執導從妃
乘輿出門降輿乘鳳轎皇太子揭簾訖遂升輅侍從如
來儀至東宮門外降輅乘輿至閣降輿入俟於內殿門
外之東西面司閨導妃詣內殿門外之西東面皇太子
揖妃入行合巹禮如中宮儀又次朝見其日妃詣內殿

陛下候皇帝升座司閨導妃入北面立再拜自西階升
宮人奉棗栗盤進至御座前授妃妃奠於御前退復位
再拜禮畢詣皇后前奉服脩盤如上儀又次醴妃次盥
饋次謁廟次羣臣命婦朝賀皆如儀四年冊開平王常
遇春女為皇太子妃禮部上儀注太祖覽之曰贅禮不
用筭但用金盤翟車用鳳轎雁以玉為之古禮有親迎
執綏御輪今用輜則揭簾是矣其合卺依古制用匏妃
朝見入宮中乘小車以帷幕蔽之謁廟則皇太子俱往

禮成後三日乃宴羣臣命婦著為令憲宗成化三十二年更定婚禮凡節冊等案俱由奉天左門出皇太子親迎由東長安門出親迎日妃服燕居服隨父母家廟行禮執事者具酒饌妃飲食訖妃父母坐堂上妃詣前四拜父命之曰爾往大內夙夜勤慎孝敬無違母命之曰爾父有訓爾當奉承合盃前於皇太子內殿各設拜位皇太子揖妃入就位再拜妃四拜然後各升座廟見後百官朝賀致詞曰某官臣某等不勝欣忭之至謹當慶

賀帝賜宴如正旦儀命婦詣太后皇后前亦賜宴致詞
曰皇太子嘉聘禮成益綿景福餘大率如洪武儀

公主下降儀

宗室附

宋

遼

元

明

臣等謹按杜佑禮典載婚禮自天子至皇太子諸
王納后納妃之儀靡不詳備至公主下降之儀載
在開元禮中而禮典則僅載唐世公主出降拜舅
姑一詔或唐以前未有定制故歟按公主貴敵諸
王宜有殊典今考宋遼元明其載於正史及會典

者以代類叙次於皇太子諸王之後以補杜氏之

闕云

宋制公主下降初被選尚者即拜駙馬都尉賜玉帶襲衣銀鞍勒馬采羅百疋謂之繫親又賜辦財銀萬兩進財之數倍於親王聘禮出降賜甲第餘如諸王夫人之制掌扇加四引障花燭籠各加十皆行舅姑之禮諸親遞加賜賚其縣主繫親以金帶賜辦財銀五千兩納財賜賚大率三分減其二宗室女特封郡君者又差降焉

仁宗嘉祐初禮官言禮閣新儀公主出降前一日行五禮古者納婚始用行卜告以夫家采擇之意謂之納采問女之名歸卜太廟吉以告女家謂之問名納吉今選尚一出朝廷不待納采公主封爵已行誕告不待問名若納成則既有進財請期則有司擇日宜稍依五禮之名存其物數俾知婚姻之事重而夫婦之際嚴如此亦不忘古禮之義也時充國公主下嫁李瑋詔賜出降日令夫家主婚者具合用雁幣玉馬等物陳於內東門外

以授內謁者進入內侍掌事者受唯馬不入

神宗即位詔以昔傳

先帝恭聞德音以舊制士大夫之子有尚帝女者輒皆
升行以避舅姑之尊豈可以富貴之故屈人倫長幼之
序宜詔有司革之以勵風俗於是著為令仍命陳國長
公主行舅姑之禮駙馬都尉王使約更不升行公主見
舅姑行禮自此始舊例長公主凡有表章不稱妾禮院
謂男子婦人凡於所尊稱臣若妾義實相對又宗室伯
叔近臣悉皆稱臣即公主理宜稱妾況家人之禮難施
於朝廷請自大長公主而下凡上牋表各据國封稱妾
從王師約唐國公主下降太常寺言按令公主出降申
之請也

中書省請皇后帥宮闈掌事人送至第外命婦從今請
如令詔出降日婉儀帥宮闈掌事者送至第外命婦免

從徽宗改公主為姬下詔曰在熙寧初有詔釐改公主
郡主縣主名稱當時羣臣不克奉承近命有司稽考前
世周稱王姬見於詩雅姬雖周姓考古立制宜莫如周
可改公主為帝姬郡主為宗姬縣主為族姬其稱大長
者為大長帝姬仍以美名二字易其國號內兩國者以
四字其出降日婚家具五禮脩表如上儀太史局擇日
告廟親迎前一日所司於內東門外量地之宜西向設
婿次其婿父醮子如上儀乃命之曰往迎肅雍以昭惠

宗祐子再拜曰祇率嚴命又再拜降出乘馬至東華門
內下馬禮直官引就次有司陳帝姬鹵簿儀仗於內東
門外候將升翟車引婿出次於內東門外鞠躬西向掌
事者執雁內謁者奉雁以進俟帝姬升車婿再拜先還
第同牢其日初昏掌事者設巾洗各二於東階東南一
於室北水在洗東尊於室中實四爵兩盞於篚婿至本
第下馬以俟帝姬至降車贊者引婿揖之以及寢門又
揖導之升階入室盥洗掌事布對位又揖帝姬皆即坐

受醖三飲俱興再拜贊者徹酒見舅姑夙興帝姬著花
釵服綸翟以俟見贊者設舅姑位於堂上舅位於東姑
位於西各服其服就位女相者引帝姬升自東階詣舅
姑前再拜贊者以棗栗授帝姬奉置舅位前舅即坐贊
者進徹以東帝姬退復位又再拜女相者引詣姑位前
再拜贊者以服脩授帝姬奉制姑位前姑即位贊者亦
徹以東帝姬退復位又再拜次醴婦盥饋饗婦如儀
遼公主下嫁儀選公主諸父一人為婚主凡當與者媒

者致詞之儀自納幣至禮成大略如納后儀擇吉旦媒者趣尚主之家詣宮竢皇帝皇后御便殿率其族入見進酒訖命皇族與尚主之族相偶飲翼日尚主之家以公主及婿率其族入見致安於皇帝皇后獻贐送者禮物訖朝辭賜公主青幃車一螭頭蓋部皆飾以銀駕駝送終車一車樓純錦銀幡懸鐸後垂大氍駕牛載羊一謂之祭羊賜其婿朝服四時襲衣鞍馬凡所須無不備選皇族一人送至其家凡親王女封公主者婚儀倣此

以親踈為差降

元制凡駙馬尚公主率封王爵其宗王之女皆稱公主
明制凡公主出降行納采問名禮婿家備禮物表文於
家庭望闕再拜掌婚者奉至內東門詣內使前曰朝恩
貺室於某官某之子某習先人之禮使臣某請納采以
表跪授內使內使跪受奉進內殿執雁及禮物者從入
內使出掌婚者曰將加卜筮使臣某問名進表如初內
使出曰有制掌婚者跪內使宣曰皇帝第幾女封某公

主掌婚者俯伏興入就次賜宴出納吉儀與納采同掌
婚者致詞曰加諸卜筮占曰從吉謹使臣某敢告納徵
婿家具元纁玉帛乘馬表文如儀掌婚者致詞曰朝恩
貺室於某官某之子某有先人之禮請臣某以求帛乘
馬納徵請期辭曰某命臣某謹請吉日親迎日婿公服
告廟曰國恩貺室於某日親迎敢告將行父醮於廳隨
意致戒婿再拜至內東門內內使延入次執雁及奉禮
物者各陳於庭其日公主禮服辭奉先殿詣帝后前四

拜受爵帝后隨意訓誡受命訖又四拜降階內命婦送至內殿門外公主升輦至內東門降輦揭簾公主升轎婿出次立執雁者以雁跪授婿婿受雁跪進於內使內使跪受以授左右婿再拜先出乘馬還公主鹵簿車輅後發公侯百官命婦送至府婿先候於門公主至婿揭簾公主降同詣祠堂婿東公主西皆再拜進爵讀祝又再拜出詣寢室婿公主同向再拜各就坐婿東公主西進饌合盃如儀復相向再拜明日見舅姑舅姑坐於

東西向公主立於西東向行四拜禮舅姑答二拜第十
日駙馬朝見謝恩行五拜禮初洪武九年太祖以太師
李善長子祺為駙馬都尉尚臨安公主先期告奉先殿
下嫁前二日命使冊公主冊後次日謁奉先殿又定駙
馬受誥儀吏部官奉誥命置龍亭至太師府駙馬朝服
拜受次日善長及駙馬謝恩後十日始定婚期二十六
年稍更儀注然儀注雖存其拜姑舅及公主駙馬相向
拜之禮終明之世實未嘗行也明年又更定公主郡主

封號婚儀及駙馬儀賓品秩孝宗弘治二年冊封仁和長公主重定婚儀入府公主駙馬同拜天地行八拜禮堂內設公主座於東西向駙馬東向座餘如前儀世宗嘉靖二年工科給事中安磐等言駙馬見公主行四拜禮公主受二拜雖貴賤本殊而夫婦分定於禮不安不聽莊烈帝崇禎元年教習駙馬主事陳鍾盛言臣教習駙馬輩永固駙馬黎明於府門外月臺四拜云至三月後則上堂上門上影壁行禮如前始視膳於公主前公

主飲食於上駙馬侍立於旁過此方議成婚駙馬饋菓
餽稱臣公主答禮書賜皆大失禮夫既合昏則儼然夫
婦安有跪拜數月稱臣侍膳然後成婚者會典再行四
拜於合昏之前明合昏後無拜禮也以天子館甥下同
隸役豈所以尊朝廷帝是其言令永固即擇日成婚

明制

凡選駙馬禮部榜諭在京官員軍民子弟年十四至十
六容貌齊整行止端莊有家教者報名司禮內臣於諸
王館會選不中則博訪於畿內山東河內選中三人欽
定一人餘二人送本處儒學充廩生自宣德時駙馬始
有教習用學官為之正統以後令駙馬赴監習禮
讀書嘉靖六年始定主事一人專在駙馬府教習

大夫士婚禮

宋

遼

明

宋品官婚禮納采問名納吉納成請期親迎同牢廟見見舅姑姑醴婦盥饋饗婦送者並如諸王以下婚四品以下不用盥饋饗婦禮士與庶人同其無雁者三舍生聽用羊假九品服

遼太宗會同三年十二月詔契丹人授漢官者從漢儀聽與漢人婚姻

明太祖洪武五年詔曰古之婚禮結兩姓之歡以重人

倫近世以來專論聘財習染奢侈其儀制頒行務從節
儉以厚風俗其時品節詳明皆有限制凡品官婚娶或
為子聘婦皆使媒氏通書女氏許之擇吉納采主婚者
設席至日具祝版告廟訖賓至女氏第主婚者公服出
迎揖賓及媒氏入雁及禮物陳於廳賓左主右媒氏立
於賓南皆再拜賓詣主人曰某官以伉儷之重施於某
某率循典禮謹使某納采主婚者曰某子弗嫺姆訓既
辱采擇敢不拜嘉賓主西南相向坐徹雁受禮訖復陳

雁及問名禮物賓興詣主婚者曰某官慎重婚禮將加卜筮請問名主婚者進曰某第幾女妻某氏出或以紅羅或以銷金紙書女之第行年歲賓辭主婚者請禮從者禮畢送賓至門外納吉如納采儀賓致詞曰某官承嘉命稽諸卜筮龜筮協從使某告吉主婚者曰某未教之女既以吉告某何敢辭納徵如納吉儀加元纁束帛函書不用雁賓致詞曰某官以伉儷之重加惠某官率循典禮有不腆之幣敢請納徵主婚者曰某官貺某以

重禮某敢不拜受賓以函書授主婚者主婚者亦答以
函書請期亦如納吉儀親迎日婿父告於禰廟婿北面
再拜立父命之曰躬迎嘉偶釐爾內治婿進曰敢不承
命再拜媒氏導婿之女家其日女氏主婿者告廟訖醴
女如家人禮婿至門下馬就大門外之次女從者請女
盛服就寢門內南向坐婿出次主婚者出迎於門外揖
而入主婚者入門而右婿入門而左執雁者從至寢戶
前北面立主婚者立於戶東西向婿再拜奠雁出就次

主婚者不降送婿既出女父母南向坐保母導女四拜
父命之曰往之女家以順為正無忘肅恭母命之曰必
恭必戒毋違舅姑之命庶母申之曰爾忱聽於訓言毋
作父母羞保母及侍女翼女出門升車儀衛導前送者
乘車後婿先還以俟婦車至門出迎於門內揖婦入及
寢門婿先升階婦從升入室婿盥於室之東南婦從者
執巾進水以沃之婦盥手於室之西北盥畢各就座婿
東婦西舉食案進酒進饌酒食訖復進如初侍女以盃

注酒進於婿婦前各飲畢皆興立於座南東西相向皆再拜婿婦入室易服婿從者餞婦之餘婦從者餞婿之餘明日見宗廟設婿父拜位於東階下婿於其後主婦拜位於西階下婦於其後諸親各以序分立其日夙興婿父以下各就位再拜贊禮引婦至庭中北面立婿父升自東階詣神位前跪三上香三祭酒讀祝興立於西婦四拜退復位婿父降自西階就拜位婿父以下皆再拜禮畢次見舅姑其日婦立堂下伺舅姑即座就位四

拜保姆引婦升自西階至舅前侍女奉棗栗授婦婦進
訖降階四拜詣姑前進服脩如前儀次舅姑醴婦如家
人禮次盥饋其日婦家備饌至婿家舅姑即座婦四拜
升自西階至舅前從者舉食案以饌授婦婦進饌執事
者加匕筯進饌於姑亦如之食訖徹饌婦降階就位四
拜禮畢舅姑再醴婦如前

庶人婚禮

宋

金

明

臣等謹按杜佑通典婚禮載至大夫士而止而於

庶民則闕焉今考宋明諸史知制有等殺有不容越分者謹列叙於左以存各朝之制度云

宋制庶人婚禮并問名於納采并請期於納成其無雁奠者或以雉及鷄鶩代其詞稱吾子親迎質明掌事者設禰位廳事東間南向婿之父服其服北面再拜祝曰某子某年若干禮宜有室聘某氏第幾女以某日親迎敢告子將行父坐廳事南向子服其服

服皂衫衣折上巾

立父

位西小南東向贊者注酒於醴授子子再拜跪受贊者

又以饌設位前子舉酒興即坐飲食訖降再拜進立父位前命之曰釐爾內治往求爾匹子再拜曰敢不奉命又再拜降出初婚掌事者設酒饌室中置二醖於槃婿服其服如前服至女家贊者引就次掌事者設禰位主人受禮如請期之儀

主人謂女父

女盛服立房中父升階立

房外之東西向

非南向者各隨其所向父立於門外之左餘倣此

贊者注酒於

醖授女女再拜受醖贊者又以饌設於位前女即坐飲食訖降再拜父降立東階下賓出次

賓謂婿

主人迎於門

揖賓入賓報揖從入主人升東階西面賓升西階進當
房戶前北面掌事陳雁於階賓曰某受命於父以茲嘉
禮躬聽成命主人曰某固願從命賓再拜降出主人不
降送初女出父戒之曰往之女家無忘肅恭母戒之曰
夙夜以思無有違命諸母申之曰無違爾父母之訓女
出婿先還俟於門外婦至贊者引就北面立婿南面揖
以入至於室掌事者設對位室中婿婦皆即坐贊者注
酒於醕授婿及婦婿及婦受醕飲訖設饌再拜贊者徹

酒饌見祖禰見舅姑禮婦饗送如儀

金章宗明昌元年十月制民庶聘財為三等上百貫次五十貫次二十貫永安五年十二月詔官籍監戶百姓自願以女為昏者聽泰和六年十一月詔屯田軍戶與所居民為婚姻者聽

明太祖洪武元年定制依朱子家禮無問名納吉止納采納幣請期下令禁指腹割衫襟為親者凡庶人娶婦男年十六女年十四以上並聽婚娶常服或假九品服

婦服花釵大袖其納采納幣請期略倣品官之儀有媒
無賓詞亦稍異親迎前一日女氏使人陳設於婿之寢
室俗謂之鋪房至若告祠醮戒奠雁合巹並如品官儀
見祖禰舅姑舅姑醴婦亦略相率

欽定續通典卷五十八